

萬有文庫

第二集七百種

王雲五主編

廣羣芳譜

(四十)

清聖祖敕撰

商務印書館發行

廣 羣 芳 譜

(四十)

清聖祖敕撰

國學基本叢書

廣羣芳譜卷五十九

果譜

安石榴 榴花別見花譜

圓安石榴

種出安石國。故名詳見花譜。

一名若榴

廣雅云若榴石榴也。丹實垂垂若贅瘤也。

一名金罌

筆衡云吳越王錢鏐改榴為金罌。

一名金龐

湧幢小品云杭

越之間呼石榴為金龐蓋避錢鏐諱也。

一名天漿

西陽雜俎云李衛公言石榴甜者謂之天漿。

有甜酸苦三種單葉者旋開花旋結實花托卽榴

不結者托尖小千葉者不結實甜者甘溫澀無毒可食潤燥制三尸蟲理乳石毒但性滯戀膈多食生痰

損肺黑齒服食家忌之酸者性溫澀無毒兼收斂之氣只堪入藥陳久更良榴實圓如毬頂有尖瓣大者

如杯皮赤色有黑斑點皮中如蜂窠有黃膜隔之子如人齒白者似雪淡紅者似水紅寶石紅者如硃砂

淡紅潔白者味甘紅者味酸秋後經霜則實自裂有富陽榴實大者海榴樹僅二尺棧盆中結實亦黃榴

結實甚多最易傳種河陰榴瑣碎錄云河陰出榴名三十

八中間止有三十八子也

【酉陽雜俎】南詔石榴

皮薄如藤紙味絕于洛中

【本草】水晶

榴子白瑩微如苦石榴抱朴子云出積石山山石榴形類類榴而小不作房生青

齊問甚多蜜漬以當果甚美

【宋書符瑞志】晉安帝隆安三年武陵臨沅獻安石榴一蒂六實

【宋書張暢傳】孝武鎮彭

城暢為安北長史魏太武遣求甘蔗安石榴暢曰石榴出自鄴下當非彼所乏

【北史魏收傳】安德王

延宗納趙郡李祖收女爲妃。後帝幸李宅宴。而妃母宋氏薦二石榴於帝前。問諸人莫知其意。帝投之。收曰：石榴房中多子。王新婚。妃母欲子孫衆多。帝大喜。詔收卿還將來。仍賜收美錦二疋。【西京新記】上林苑有安石榴十株。【園祭儀】秋嘗果以梨棗柰安石榴。【拾遺記】吳主以潘夫人遊昭宣臺。志意幸愜。既盡酣醉。睡於玉壺中。使侍婢瀉於臺下。得火齊指環。卽挂石榴枝上。因其處起臺。名曰環榴臺。【述異記】瀨鄉老子祠有紫石榴。【園洛陽伽藍記】白馬寺在西陽門外三里。京師語曰：白馬甜榴。一實直牛。【鄴中記】石虎苑中有安石榴。子大如孟碗。其味不酸。【園西陽雜俎】梁大同中。東州後堂石榴。皆生雙子。大食勿斯離國石榴。重五六斤。【劇談錄】武宗朝。術士金陵許元長善變幻。武宗謂之曰：先朝明崇儼取羅浮山甘子。萬里往來。止於旬日。東都當進石榴。時已熟矣。卿今日當致十顆。元長奉詔而出。及旦寢殿始開。金盤貯石榴。致於御榻。俄有使奉進。亦以所失之數。上聞。靈驗變通。皆如此類。【北戶錄】鄭虔云：石榴堪作胭脂。睿宗女代國公主常爲之。棄其實於禁中。叢生成林。【海錄碎事】邵武郡庭有石榴一株。士人視所實之數。以爲登科之信。熙寧庚戌歲。有雙實於木末者。又有附枝而雙實者。是歲葉祖洽上官均名在一二。何與京兄弟同榜。祖洽有詩曰：已分桂葉爭雲路。不負榴花結露枝。蓋謂此也。【本草】安石榴有酸淡兩種。道家謂之三尸酒。云三尸得此果則醉。【澄懷錄】郭文在山間有石榴楊梅。爲樵牧所傷。文賣簪沽酒。以澆花樹。人問之。曰：爲二子洗瘡止痛。【學圃餘疏】安

石榴無如京師。致之南方多不活。卽活多化爲叢狀。不若求富陽種種之。實大子綻。卽不甘亦足供玩。

【花史】石崇園有石榴名石崇榴。

【輿地賦】晉潘尼安石榴賦并序。安石榴者天下之奇樹。九州之名果。是以屬文之士。或敍而賦之。蓋感時而騁思。覩物而興辭。余遷舊宇。爰造新居。前臨曠澤。却背清渠。實有斯樹。植於堂隅。華實並麗。滋味亦殊。可以樂志。可以充虛。朱芳赫奕。紅萼參差。含英吐秀。乍含乍披。遙而望之。煥若隋珠。耀重川。詳而察之。灼若列宿。出雲間。湘涯二后。漢川遊女。攜類命儔。逍遙避暑。托斯樹以棲遲。遡祥風而容與。爾乃擢纖手兮舒皓腕。羅袖靡兮流芳散。披綠葉兮修條。綴朱華兮弱榦。豈金翠之足珍。實茲葩之可玩。商秋授氣。收華斂實。千房同蒂。十子如一。繽紛磊落。垂光耀質。滋味浸液。馨香流溢。【張載安石榴賦】有若榴之奇樹。肇結根於西海。仰青春以啓萌。晞朱夏以發采。揮光垂綠。擢榦曜鮮。燿若羣翡。俱棲爛若百枝。並燃煥乎郁郁。焜乎煌煌。仰映青霄。俯燭蘭堂。似西極之若木。譬東谷之扶桑。於是天迴節移。龍火西夕。流風晨激。行露朝白。紫房旣熟。頰膚自坼。剖之則珠散。含之則冰釋。【張協安石榴賦】攷草木於方志。覽華實於園疇。窮陸產於包貢。嗟英奇於若榴。耀靈葩於三春。綴霜滋於九秋。爾乃飛龍啓節。揚颺扇埃。含和澤以滋生。鬱敷萌以挺栽。傾柯遠擢。沉根下盤。繁莖篠密。豐榦林攢。揮長枝以揚綠。披翠葉以吐丹。流暉俯散。迴葩仰照。爛若百枝。並燃。燿如烽燧。俱燎。皦如朝日。晃若籠燭。晞絳綵於扶桑。接朱光於若木。爾

乃頰萼挺蒂。金牙承蕤。蔭佳人之玄髻。發窈窕之素姿。游女一顧傾城。無鹽化爲南威。于是天漢西流。辰角南傾。芳實磊落。月滿虧盈。爰採爰收。乃剖乃拆。內憐幽以含紫。外滴瀝以霞赤。柔膚冰潔。凝光玉瑩。璀璨如冰碎。泫若珠迸。含清冷之溫潤。信和神以理性。【應貞安石榴賦并序】余往日職在中書。時直廬前有安石榴樹。枝葉旣盛。華實甚茂。爲之作賦。挹微露以鮮采。承輕風而動葩。南拂陰檐。北扇陽阿。其旁則有大廈崇房。重廊高廡。皇籍帝典。圖書之府。時移節變。大火西旋。丹葩結秀。朱實星懸。膚坼理阻。爛若珠駢。【潘岳河陽庭前安石榴賦】仰天路而高睇。顧鄰國以相望。位莫微於宰邑。館莫陋於河陽。雖小縣陋館。聊可以遊。實有嘉木。曰安石榴。修條外暢。榮幹內樛。扶疎偃蹇。冉弱紛柔。于是暮春告謝。孟夏戒初。新莖擢潤。膏葉垂腴。曾華曄以先越。含榮鸚其方敷。丹暉綴於朱房。紺葍點乎紅鬚。煌煌焯焯。熠爍委累。似琉璃之棲鄧林。若珊瑚之暎綠水。光明燐爛。含丹耀紫。味滋芳神。色麗瓊蕖。遙而望之。煥若隨珠耀重淵。詳而察之。灼若列星出雲間。十房同膜。千子如一。御渴療飢。解醒止疾。旣乃攢乎狹庭。載阨載褊。土階無等。肩牆惟淺。壁衣蒼苔。瓦被駁蘚。處悴而榮。在幽彌顯。其華可翫。其實可珍。羞於王公。薦於鬼神。豈伊仄陋。用渝厥眞。果猶如之。而況於人。【宋梅堯臣矮石榴樹子賦并序】襄城縣庭下生矮石榴。往來者異之子。爲作賦寫其狀。因以自勵云。有矮石榴。其高倍尺。中訟庭。儼戒石。訪諸走胥。云非封植。忽此生榮。三傳歲曆。密葉如蓋。繁條如織。萎蕤下垂。疲軟無力。細苞貯露。纍纍仄仄。下人俯視。頗本可識。雀愧卑棲。

而不肯集兮。故啾唧以矯翼。偃偃盤盤。若屈若鬱。紉紉結結。非曲非直。榦不足攀。陰不足息。夫何挺質之可惑耶。意爲異與爲妖。人以爲異。我不知其異。曰殊衆人之類。類人以爲妖。我不知其妖。曰乖衆木之翹翹。然而不生樊圃臺榭遊觀之所。產茲堂下。其有以警而有以覩。因形取義。庶將有補。當革蔓衍之多枝。無若軟柔之不舉。勿俾苞苴之流行。勿使吏氓之輕侮。勿泆忍以自抑。勿猶豫而失處。勿闕茸以接卑。勿上下之不撫。夫如是。則異也妖也。固弗取。維戒懼斯主。

【五言古詩】**園**【梁元帝咏石榴】塗林未應發。春暮轉相催。燃燈疑夜火。連珠勝早梅。西域移根至。南方釀酒來。葉翠如新翦。花紅似故栽。還憶河陽縣。映水珊瑚開。【王筠摘安石榴贈劉孝威】中庭有奇樹。當戶發華滋。素莖表朱實。綠葉廁紅蕤。旣標太冲賦。復見安仁詩。宗生仁壽殿。族代河陽湄。有美清淮北。如玉又如龜。退書寫蟲篆。進對多好辭。我家新置側。可求不難識。相望阻盈盈。相思滿胸臆。高枝爲君採。請寄西飛翼。**園**【宋梅堯臣詠石榴】榴枝苦多雨。過熟拆已半。秋雷石罌破。曉日丹砂爛。任從雕俎薦。豈待霜刀判。張騫西使時。蒟醬同歸漢。**園**【梅堯臣陽武王安之寄石榴】安榴若拳石。中蘊丹砂粒。剖之珠落盤。不待鮫人泣。舊友大河濱。作宰實畿邑。嚴霜百果熟。爲贈忽我及。始時童稚嬌。爭取猴猿集。老夫所食微。何暇更收拾。聊答君意勤。作詩恨短澀。【元朱德潤題石榴】雨餘鳴蜩歇。衆綠鬱陰翳。綃囊蹙紅巾。光焰當林麗。映日萼先皴。臨風葉如綴。秋深薦紅實。顆裂排皓齒。秣應乘槎客。天上得先味。

【七言古詩】**唐皮日休石榴歌**蟬噪秋枝槐葉黃。石榴香老愁寒霜。流霞包染紫鸚粟。黃蠟紙裹紅剝房。玉刻冰壺含露濕。爛斑似帶湘娥泣。蕭娘初嫁嗜甘酸。嚼破水精千萬粒。【莊布石榴歌】玳瑁殼。皺枝婀娜。馬牙硝骨綿敷裹。霜風擊破錦香囊。鸚鵡啄殘紅豆顆。美人擎在金盤腹。錯認海螺斑碌碌。滿口含嘗瓊液甘。一堂齒冷敲寒玉。【金元格從趙敷道覓石榴】仙人囊中五色露。得種昔與蒲桃俱。猩猩染花開五月。已覺秋實懸庭除。張園一酸齒欲裂。君家兩株蜜不如。竹馬兒童厭梨栗。綠囊聊爲剝紅珠。

【五言律詩】**宋鄭獬石榴**高枝重欲折。霜老拆丹膚。試剖紫金椀。滿堆紅玉珠。根雖傳大夏。種必近仙都。題作江南信。人應賤橘奴。

【七言律詩】**宋楊萬里石榴**深著紅藍染暑裳。啄成紋玳敵秋霜。半含笑裏清冰齒。忽綻吟邊古錦囊。霧縠作房珠作骨。水晶爲粒玉爲漿。劉郎不爲文園渴。何苦星槎遠取將。【方廣德石榴】塗林疎樹自離離。入眼紅膚總不遺。若爲連珠過沈約。何來新築伴潘尼。金房半坼珠駢落。霜葉平翻玉並欹。還記葡萄槎上種。折來那不稱同時。

【五言絕句】**宋晏殊石榴**開從百花後。占斷羣芳色。更作琴軫房。輕盈瑣牕側。【蘇軾和子由岐下石榴】風流意不盡。獨自送殘芳。色作裙腰染。名隨酒琖狂。【范成大題石榴】日烘古錦囊。露浥紅

瑪瑙玉池嚙清肥。三彭跡如掃。【明王穀祥題石榴】榴房拆錦囊。珊瑚何齒齒。試展畫圖看。憑將頰多子。【陳淳石榴】未摘露前實。先看雨後花。名應出西海。顏豈論東家。蠟蒂團頰玉。文英簇絳綃。秋來結佳果。珍味不須調。

【七言絕句】唐李商隱石榴。榴枝婀娜榴實繁。榴膜輕明榴子鮮。可羨瑤池碧桃樹。碧桃紅頰一千年。【詞】宋劉子翬石榴。庭榴結實墊芳叢。一夜飛霜染茜容。萬子同苞無異質。金房玉隔謾重重。【陸游山店賣石榴取以薦酒】山色蒼寒雲釀雪。旗亭據榻興悠哉。麴生正欲相料理。喚取風流措措來。【明沈周石榴】張鴛帶得西來種。中祕千珍及萬珍。一箇臭囊藏不盡。又從身外覆精神。

【詩散句】宋宋祁不競灼灼花。只效離離實。【明沈周】累累枝上實。滿腹飽珠璣。【陳淳】結果多佳子。甘酸合鼎調。【宋宋祁】烟滋黛葉千條困。露裂星房百子均。【石延年】盡日攜樽芳樹下。何須佳醞得塗林。【張舜民】人拾烏銜真可惜。皮開子落不論錢。【陸游】半吐山榴看著子。新來梁燕見將雛。【宋謝朓】珠榴拆且紅。【陳江總】庭榴剖朱實。【唐王維】夕雨紅榴拆。【韓愈】味美蔗爲漿。潛苞絳實拆。【宋邵雍】久雨榴自罅。【歐陽修】晴林紫榴拆。【黃魯直】紅榴罅玉房。【唐元稹】海榴紅綻錦窠勻。【唐韋莊】誰家樹壓紅榴拆。【宋錢惟演】蜜房初滿若榴紅。【陸游】露重榴房初拆罅。風拆安榴子滿房。

【別錄】**梁書海南傳**：頓遜國有酒樹似安石榴，取汁停瓮中，數日成美酒。【記事珠】李漢碎胡瑪瑙盤，盛送王莒曰：安石榴莒見之不疑，既食乃覺。【東坡集】回先生過湖州東林沈氏飲，醉以石榴皮書其東老菴之壁云：西鄰已富憂不足，東老雖貧樂有餘。白酒釀來因好客，黃金散盡爲收書。坡聞而次其韻，淒涼雨露三年後，髣髴塵埃數字餘。至用榴皮緣底事，中書君豈不中書。【志雅堂雜抄】凡碾工描玉用石榴皮汁，則見水不脫。【湧幢小品】金荊榴樹，色如真金，密綴而文采，盤蹙如美錦，細膩而香。隋時朱寬征南，得數十片，作枕及案面，沉檀所不及。【嫁榴】石榴不結子者，以石塊或枯骨安樹叉間或根下，則結子不落。【藏榴】選大者連枝摘下，安新瓦缸內，以紙十餘重密封蓋之。

栗

【增】**本草**：栗，說文作栗，從肉音條，象花實。木高二三丈，極類櫟，四月開，花青黃色，長條似胡桃，花實有房，彙大者若拳，小者若桃李。【園栗苞生外殼刺如蝟毛，其中著實，或單或雙，或三四，少者實大，多者實小，實有殼，紫黑色，殼內膜甚薄，色微紅黑，外毛內光，膜內肉，外黃內白，八九月熟，則苞自裂而實墜。宣州及北地所產小者爲勝。陸璣詩疏曰：栗五方皆有，周秦吳揚特饒，惟漁陽及范陽生者，甜美味長，他方不及。本草圖經云：兖州宣州最勝，燕山栗小而味最甘。蜀本圖經云：板栗，樹大，芽栗，似板栗而細如橡子，但春生夏花，秋實冬枯，爲異。綱目云：卽爾雅所謂榹栗也，一名榹栗，可炒食之。衍義云：湖北有一種旋栗，圓末尖，卽榛。【西京雜記】上林

苑栗四。侯栗。榛栗。瑰栗。嶧陽栗。嶧陽都尉曹龍所獻大如拳。

【唐本草】桂陽有荜栗。叢生實大如杏仁皮子形色與栗無異但小耳。又有奧

皆與栗同子圓而細惟

栗。江湖有之或云卽莘也。【客燕雜記】京師佳果栗三霜前栗盤古栗鷹爪栗。栗之爲果種類頗

多。總之味鹹氣溫無毒。主益氣厚腸胃補腎氣治腰脚無力破痲癖理血當中一子名栗楔治血更效。生則動氣熱則滯氣唯曝乾或火煨汗出食之良。百菓中最有益者。小兒不宜多食難尅化。患風水病者忌以味鹹也。

【詩鄘風】樹之榛栗。

【鄭風】東門之栗。

【秦風】隰有栗。

【小雅】山有嘉卉侯栗侯

梅。【禮記內則】栗曰撰之。【疏】栗蟲好食數數布陳撰省視之。【儀禮士冠禮】再醮兩籩栗脯。

【聘禮】夫人使下大夫勞以二竹篋。方玄被纁裏有蓋其實棗蒸栗擇兼執之以進。賓受棗大夫二手授栗。【論語】周人以栗。【疏】凡建邦立社各以其土所宜之木。周都豐鎬宜栗。【史記蘇秦傳】秦

說燕文侯曰。南有碣石雁門之饒。北有棗栗之利。民雖不佃作而足於棗栗矣。此所謂天府也。【貨殖

傳】燕秦千樹栗。其人與千戶侯等。【後漢書馬韓國傳】馬韓出大栗如梨。【宋書劉秀之傳】秀

之大明元年徵爲石衛將軍。明年遷丹陽尹。先是秀之從叔穆之爲丹陽尹。與子弟於廳事上飲宴。秀之

亦與焉。廳事有一穴。穆之謂子弟及秀之曰。汝等試以栗遙擲此柱。若能入穴。後必得此郡。諸子並不能

中。唯秀之獨入焉。【梁書沈約傳】約嘗侍讌豫州獻栗徑寸半。帝奇之。問曰。栗事多少。與約各疏所憶。

約少帝三事。出謂人曰。此公護前。不讓卽羞死。帝以其言不讓。欲抵其罪。徐勉固諫乃止。【王泰傳】泰幼敏悟。年數歲時。祖母集諸孫姪。散棗栗于牀。羣兒皆競之。泰獨不取。問其故。對曰。不取自當得賜。由是中表異之。【南史蕭琛傳】琛經預御筵。醉伏。上以棗投琛。琛乃取栗擲上。正中面。時御史中丞在坐。帝動色曰。此中有人。不得如此。豈有說耶。琛卽答曰。陛下投臣以赤心。臣敢不報以戰栗。【宋史禮志】太宗景祐三年。禮官宗正請每歲冬孟月。羞以兔果。以栗蔬以薦奠。【宋史孝義傳】易延慶奉母至孝。母存日喜食栗。乃種二栗樹於墓前。經年其樹連理。三年合抱。生栗盈枝。人以爲孝感所致。【遼史蕭韓家奴傳】韓家奴先爲右通進。典南京栗園。後遷天成軍節度使。徙彰愍宮使。帝與語才之。命爲詩友。嘗從容問曰。卿居外有異聞乎。韓家奴對曰。臣惟知炒栗小者熟。則大者必生。大者熟。則小者必焦。使大小均熟。始爲盡美。不知其他。帝大笑。【山海經】銅山葛出。賈超之山。其木多栗。【夏小正】八月栗零。【傳】零也者。降也。降而後取之也。【尙書逸篇】西社惟栗。【原】范子。栗出三輔。【莊子】莊周遊乎雕陵之樊。視一異雀。自南方來。感周之頽。而集於栗林。【呂氏春秋】果之美者。有箕山之栗。【神異經】東方荒中有木。名曰栗。其殼徑三尺。三寸。殼刺長丈餘。實徑三尺。殼亦黃。其味甜。東北荒中有木。高四十丈。葉長五尺。廣三尺。名曰栗。其實徑三尺。二寸。其殼赤。其肉黃白。味甜。食之令人短氣而渴。【原】說苑。田饒曰。果園梨栗。後宮婦人。撫以相摘。而士曾不得一嘗。【東方朔傳】朔曰。王公啖兒。

以丹粟霞漿兒食之既多飽悶幾絕乃飲玄天黃露半合卽醒。【園】三輔黃圖三秦記云御宿園出粟十五枚一升。【會稽先賢傳】光武詔嚴遵詣行在蜀郡獻栗橘上使公卿各以手所及取之遵獨不取上問故遵曰君賜臣以禮臣奉君以恭今賜無主臣是以不敢取。【園】盧諶祭法春秋冬祠皆用栗。【晉宮閣名】華林園中栗一株侯栗六株。【廣志】栗有關中侯栗大如雞子梁州獻栗徑寸半越中栗大如拳。【鄴中記】鄴中產巨栗脫其殼可以爲杯。【園】豫章古今記宋度拜定陵令縣人杜伯夷清高不仕度與談論設棗栗而已。【園】水經注汝水灣中有地數頃上有栗園栗小殊不並固安之實也然歲貢三百石以充天府水渚卽栗州也樹木高茂望若屯雲積氣矣林中有栗堂射埽甚閑敞牧宰及英彥多所遊薄。【括地志】漢武帝果園栗味甘而小不如三秦記所云固安之栗天下稱之爲御栗因有栗園。【地理志】諸暨產如拳之栗。【華山記】西山麓中有栗林藝植以來蕭森繁茂。【西陽雜俎】李衛公一夕甘子園會客盤中有猴栗無味。陳堅處士云虔州南有漸栗形如素核。【杜陽雜編】滄浪洲有碧棗丹栗皆大如拳。【園】續仙傳道人殷七七名文祥能造逡巡酒開頃刻花嘗一官僚召飲取栗散於官妓皆聞異香唯笑七七者栗綴於鼻不可脫但聞臭須臾狂舞粉黛狼籍共爲陳謝始墜。謝玄卿遇神仙設鳳冠栗。【園】清異錄晉王嘗窮追汴師糧運不繼蒸栗以食軍中遂呼栗爲河東飯。【西溪叢語】杜甫詩云嘗果栗皴開或作雉字殊不可解集韻皴側尤切革紋皴也漢上題襟

周繇詩云。開栗弋之紫皺。貫休云。新蟬避栗皺。又云。栗不和皺落。卽栗蓬也。【青箱雜記】王文正公旦。與楊文公億。爲空門友。楊公謫汝州。公適當軸。每音問不及他事。唯談論真諦而已。余嘗見楊公親筆與公云。山栗一秤。聊表村信。蓋汝惟產栗。而億與王公忘形交。以一秤栗遺之。斯亦昔人雞黍縞紵之意乎。【老學菴筆記】故都李和。爛栗名聞四方。他人百計效之。終不可及。紹興中。陳福公及錢上閣出使至燕山。忽有兩人持爛栗各十裹來獻。三節人亦人得一裹。自贊曰。李和兒也。【五色線】王可交。棹漁舟入江。遇一彩舫。有道士七人。玉冠霞帔。侍從十餘人。鬢角雲鬢。面前各有青玉盤。酒器呼可交上舫。命與酒喫。侍者瀉酒於尊。酒再三不出。道士曰。酒靈物。若得入口。當換其骨。瀉之不出。亦命也。一人曰。與栗出。俄取二栗與之。其栗青赤。光如棗。長二寸許。嚼之有皮。非人間之栗。肉脆而甘。可交食栗之後。絕穀運靜。若有神助。【柝津日記】遼於南京置栗園。司蕭韓家奴爲右通進典。南京栗園是也。元昌平縣亦有栗園。徹里傳戰于昌平栗園是也。蘇秦謂燕民雖不耕作。而足于棗栗。唐時范陽以爲土貢。今燕京市肆。及秋。則以錫拌雜石子爆之。栗比南中差小。而味頗甘。以御栗名。正不以大爲貴也。

【輿圖賦】【漢蔡邕傷故栗賦并序】人有折蔡氏祠前栗者。故作斯賦。樹遐方之嘉木兮。于靈宇之前庭。通二門以征行兮。夾階除而列生。彌霜雪而不凋兮。當春夏而滋榮。因本心以誕節兮。凝育蘗之綠英。形猗猗以豔茂兮。似翠玉之清明。何根莖之豐美兮。將蕃熾以悠長。適禍賊之災人兮。嗟天折以摧傷。

【陳陸瓊栗賦】四時逸盛。百果玄芳。綠梅春馥。紅桃夏香。何羣品之浮脆。惟此質之久長。外刺同夫拱棘。內潔甚于冰霜。伏南安而來清。列御宿而懸房。薦羞則根榛並列。加籩則菱芡同行。金盤兮麗色。玉俎兮鮮光。周人以之戰懼。大官稱於栢梁。

【啓】梁庾肩吾謝東宮栗啓。查或火成。鑽以爲屑。柰稱煎用。曝而成糗。未若北燕巨實。用奪榮枯。南國脯山。翻成齒決。承恩踴躍。對聞喜之河。念報屏營。問知來之鳥。

【雜言】陳陸玠賦得雜言詠栗。貨見珍于有漢。木取貴于隆周。英肇萌于朱夏。實方落于素秋。委玉盤。雜椒精。將象席。糅珍羞。

【文賦散句】漢王褒僮約。南安拾栗採橘。王逸荔枝賦。北燕薦朔濱之巨栗。晉左思蜀都

賦。榛栗罅發。魏都賦。固安之栗。盧毓冀州論。中山好栗。地產不爲無珍。梁昭明太子七

召。汶垂蒼栗。七契。北燕之栗。

【五言古詩】宋梅堯臣尹陽尉耿傳惠新栗。金行氣已勁。霜實繁林梢。尺素走下隸。一奩來遠郊。中黃比玉質。外刺同芡苞。野人寒齋會。山爐夜火炮。梨慚小兒嗜。茗憶羸官拋。此焉真可貺。遽爾及衡茅。

【文同】天師攜此種。至自上饒遠。當時十七樹。高榦寄弧巘。蒼蓬蒺藜大。紫殼檳榔軟。蜀都名果中。推之爲上選。

【七言律詩】**園**【宋蘇轍次韻王適食茅栗】相從萬里試南餐。對案長思首蓓盤。山栗滿籃兼白黑。村醪入口半甜酸。久聞牛尾何曾試。竊比雞頭意未安。故國霜篷如盃大。夜來彈劍似馮驩。【朱子栗熟】樹雜椅桐繼國風。莫教林下長蒿蓬。共期秋實充腸飽。不羨春花轉眼空。病起數升傳藥錄。晨興三咽學仙翁。櫻桃浪得銀絲薦。一笑纔堪發面紅。【元張雨新栗寄雲林】榻來常熟嘗新栗。黃玉穠分紫殼開。果園坊中無買處。頂山寺裏爲求來。囊盛稍共來禽帖。酒薦深宜蘸甲杯。首奉雲林三百顆。也勝酸橘寄書回。

【七言絕句】**園**【宋石介栗園】游困歸來訪栗園。栗園老樹再生孫。莫驚頭上見髮白。拾栗兒童長幾番。**園**【蘇轍栗】老去自添腰脚病。山翁服栗舊傳方。客來爲說晨興晚。三咽徐收白玉漿。【陸游夜食炒栗有感】齒根浮動欲吾衰。山栗炮燂療夜飢。喚起少年京輦夢。和寧門外早朝時。

【詩散句】**園**【唐韓愈】霜天熟柿栗。收拾不妨遲。【杜甫】羞逐長安社中兒。赤雞白狗賭梨栗。**園**【宋孫觀】綈囊丹果十襲包。爆栗飛爐石火敲。【范成大】紫爛山梨紅皺棗。總輸易栗十分甜。【陸游】蝟刺坼蓬新栗熟。鵝雛弄色凍醅濃。【周庾信】家童掃栗跼。秋林栗更肥。**園**【唐杜甫】穰多栗過拳。山家蒸栗暖。【韋應物】採栗玄猿窟。**園**【韓翃】霜迎栗罅開。【張籍】秋猿守栗林。**園**【李洞】雲深猿拾栗。【宋張耒】園栗炮還美。【陸游】霜栗大如拳。【元方回】擘黃新栗嫩。**園**

【唐杜甫】盤剝白鷄谷口栗。【圖】皮日休野猿偷栗重窺戶。【宋蘇轍】山栗似拳應自飽。

【圖】相玉書黃侔蒸栗。【種樹書】採栗時要得披殘。明年其枝葉益茂。【物類相感志】栗得橄

欖香。【園】收藏藏生栗法。霜後取生栗投水中。去浮者。餘漉出布拭乾。曬少時。令無水脈爲度。先將沙

炒乾放冷。取無油酒器新罈。裝入一層栗。一層沙。約八九分滿。用箬葉紮緊。掃一淨地。將器倒覆其上。

略以黃土封之。弗近酒器。可至來春不壞。又法。栗子一石。鹽二斤。水泡開。浸栗一二宿。漉出曬乾。同芝

蔴二石拌勻。盛荊園中。永遠不壞。食之軟美。藏乾栗法。霜後取沉水栗一斗。用鹽一斤。調水浸栗。令沒

經宿漉起。曬乾。用竹籃或麤麻布袋掛背。日少通風處。日搖動一二次。至來春不損不蛀不壞。【種藝】

齊民要術云。栗種而不栽。栽雖活尋死。栗初熟離苞。卽於屋內埋濕土中。埋須深。弗令凍。路遠者以革囊

盛之。停三日以上。及見風日。則不可作種。至二月芽生出。而種之。芽向上乃生根。既生數年不用掌。近三

年內。每到十月。常須草裹。至二月漸解。不裹則易至凍死。仍用籬圍之。其實方而匾者。他日結子豐滿。樹

高四五尺。取生子樹枝接之。【製用】以兩栗蘸油。兩栗蘸水。置鍋中。周圍更排四十七個。濕紙搭蓋。慢

火燒。候有爆聲卽熟。大栗每個殼底以刀十字畫開。底向下。逐旋排鍋中。以鹽一撮繞鍋撒下。蓋定發

火。候熟取用。選底平可作對者二枚。一枚香油塗濕底。一枚白水塗濕底。合作一對。置鍋底當中。取栗

逐旋蓋上。多亦不妨。將鍋蓋嚴燒一飯頃。取出。俱酥熟。且不黏殼。又法。入油紙捲一條炒。不用鐵鍋。尤